

TUN M, TSMY HANYA KERJASAMA POLITIK TERHAD ISU 1MDB, DERMA

Malaysia Today

March 3, 2016

By admin-s

(Sinar Harian) – Kerjasama politik Pakatan Harapan dengan Tun Dr Mahathir Mohamad dan Tan Sri Muhyiddin Yassin dalam gerakan baharu terhadap kepada isu 1Malaysia Development Malaysia (1MDB) dan derma RM2.6 bilion jika mereka berdua tidak bersedia melakukan reformasi institusi di negara ini secara menyeluruh.

Setiausaha Agung PKR, Rafizi Ramli berkata, jika kedua-duanya enggan bekerjasama melakukan reformasi secara besar-besaran kepada institusi kerajaan dan undang-undang, penyertaan mereka hanya kepada usaha penyingkiran Datuk Seri Najib Tun Razak dari jawatan Perdana Menteri.

“Sama ada kerjasama itu jadi lebih erat dan formal atau sebaliknya, bergantung kepada kesediaan mereka dan reformis Umno untuk membincangkan bentuk reformasi itu bagi mengelakkan perkara sama berulang di masa hadapan.

“Dari segi hala tuju Pakatan Harapan, perkembangan melibatkan Mahathir, Muhyiddin dan pimpinan Umno lain yang membantah Najib, (ia) tidak mengubah dasar-dasar dan program kita selama ini,” katanya kepada Sinar Harian, semalam.

Rafizi berkata, mesyuarat Majlis Presiden Pakatan Harapan pada Isnin depan akan membincangkan gerakan baharu itu khususnya butiran rundingan kempen menyelamatkan Malaysia.

“Saya jangka paling kurang pimpinan Pakatan Harapan boleh bersetuju untuk bersama-sama Mahathir dan Muhyiddin dalam isu-isu yang telah dipersetujui seperti 1MDB dan pendakwaan terhadap Najib kerana wang RM2.6 bilion.

“Bersama-sama itu bermaksud mereka boleh hadir sepentas atau mengeluarkan kenyataan bersama atau menandatangani pengisytiharan bersama,” katanya.

Ahli Parlimen Pandan itu turut mengalu-alukan semua pihak khususnya rakan tahaluf siyasinya, iaitu Pas untuk turut serta.

“Namun saya nampak kenyataan-kenyataan daripada pimpinan Pas setakat ini tidak cenderung ke arah apa-apa tindakan yang boleh menjatuhkan Najib sebelum pilihan raya,” katanya.

Isnin lalu, Mahathir merancang menubuhkan sebuah gerakan utama bersama parti pembangkang bagi singkir Najib, namun beliau tidak berhasrat menubuhkan sebuah parti politik baharu.

Copyright (C) 2004 - 2015 Malaysia Today. All Rights Reserved.

Source: <http://www.malaysia-today.net/tun-m-tsmv-hanya-kerjasama-politik-terhad-isu-1mdb-derma/>